

編號 1 號

【爛布子歲月】李宜諭原作

六月个南臺灣，鄉下个溝仔脣、人家屋前屋背，總會睺著青黃黃、細細粒、打到歸樹極个爛布子。又到咧斫爛布子、擇爛布子、搨<sup>1</sup>爛布子个時節，該係記憶裡背个好味緒。

頭擺，阿嬤在楊寮下田脣兼溝仔个所在，種咧三頭爛布子樹。逐年五、六月，爛布子好摘咧，寮日个打早，阿爸就會用奧多拜載等僱兜恁多姊妹，奧多拜个後架仔再拖一輛里阿卡<sup>2</sup>，去楊寮下摘爛布子。去到楊寮下，遠遠就睺著阿公既經擊等大刀嫲在該剝樹極咧，一極一極當大梗个樹極剝下來，阿爸就膠大樹極拖到共下，再膠結等爛布子个部分，一細把一細把剝下來，僱兜細孃嘍仔就搨手膠爛布子落<sup>3</sup>到布袋裡背。到尾，阿爸會膠一布袋一布袋个爛布子，上到里阿卡頂載轉屋下。

轉到屋下，阿姆既經膠一隻大腳盆放到天井咧。爛布子漕到腳盆肚再舀滄水，大家就圍等腳盆，坐到矮楯頭頂，開始擇爛布子。因為擘忒蒂頭个爛布子會有液液个乳，所以，兩隻手愛浸在

水裡背，一粒一粒擇。擇好个爛布子放到細盆仔裡背，無愛个梗就掉到大腳盆脣。兩隻手浸在水肚久咧，手指會皺皮皺皮，當像老人家个手，有兜得人驚。

因為愛一細把一細把緊搨、緊尋、緊擇，下把仔會昏嗲昏嗲<sup>4</sup>，毋堵好膠梗丟到細盆仔裡背，爛布子嘎揸到盆仔外背，精神咧正又煞煞膠擇好个爛布子拈轉細盆仔肚，正式係加無閒个。

滄滄一腳盆个爛布子差毋多愛擇完點鐘。阿嬤會膠擇好个爛布子漕落大鑊頭裡背，窿樵燒火，還不時愛攪攪啊，正毋會結爌。爛布子煮熟咧，還燒燒就愛舀到碗肚膠鹽去搨，鹽係多一息較會成砵。就恁樣燒手燒腳<sup>5</sup>無閒一日，一砵一砵个爛布子總算做好咧。

爛布子加蒜頭煎到赤赤一等好食，下把仔膠雞卵去煎還較香，係細人仔个最愛。僱爸為著愛拐僱兜細人仔食飯，就教僱兜一細砵爛布子傍一大口飯，飯吞下去咧，再用大門牙嚙等爛布子仁，過用舌嫲西啊出<sup>6</sup>，睺哪儕个爛布子仁射最遠，所以，逐餐食飯都緊爽緊食、嘻嘻哈哈。

該段擇爛布子、西爛布子仁个日仔，也係僱永遠記在心个幸福歲月。

<sup>1</sup> 搨：音 kied；用手攪拌或擠壓。

<sup>2</sup> 里阿卡：音 li' a ka'；外來語，兩輪拖車，可以人力拉動或連結於車輛後方。

<sup>3</sup> 落：音 log；用手收拾起來。

<sup>4</sup> 昏嗲昏嗲：音 fun de fun de；頭腦不清楚。

<sup>5</sup> 燒手燒腳：音 shau' shiu' lug giog'；比喻操作燙手的工作。

<sup>6</sup> 西啊出：音 te' a' chud'；吐舌或用舌頭將口中之物剔出。

編號 2 號

【該下】林伯殷原作

「投手擲出球」、「打擊者出力一晃，球飛向一壘！」、「哦！一壘手跔啊下接殺，黏時用腳蹂轉壘包，一壘跑者赴毋掣走轉一壘，再見雙殺！」「臺灣贏了！臺灣贏了！臺灣得著世界棒球十二強比賽冠軍！臺灣冠軍！臺灣冠軍！……」電視主播喊到聲脛強強會失忒了。該下，球場裡肚个臺灣選手嘍了、教練嘍了、現場膠電視面頭前个球迷也嘍了。該下，臺灣人非常感動，也當沙鼻，因為，這群選手實現了臺灣人打野球个百年夢想，完成了臺灣人當望，毋過，毋識望著个心願。

日頭下，一群炙到烏刻刻个球員在球場練球，聽等教練个指導膠示範，認真學習各種基本動作。練了一擺又一擺，就算汗流脈落，衫褲溼了又燥、燥了又溼，也無歇睏一下。恁樣煞猛練習，就係為著在比賽个時節做得有好个表現、好个成績。臺灣從少棒到成棒，各地各級个選手都係一路打拚上來个湛斗硬料。好得恁多年，臺灣打野球个環境有改善了，培養出恁多出名个球員，現場點兵恁多好人才，組成恁勻線个球隊來代表臺灣出戰。因爭有大家个長期投入，正有打贏比賽該下个歡喜膠感動目汁。

除忒長期个努力，也愛有當多頭過个該下，正會有包尾光榮个該下。像：嘉義農林野球隊得到甲子園亞軍、紅葉少棒隊、三級棒球隊去美國比賽得冠軍、臺灣職業棒球開始、臺灣球員加入大聯盟比賽等等。這一次又一次个該下，分大家一擺又一擺來關心棒球比賽，這種熱情一直在恁俚个心肝肚，毋識烏忒，臺灣个棒球歷史正有機會寫到提十二強冠軍該下。當然，該下毋係結束，因為，棒球比賽還係會繼續參加下去，相信還有當多感動人个該下會續等下去。

臺灣人有好沙鼻、有好分人安腦該下，表示大家識打拚過了，像：棒球、羽毛球、晶片製造、全民健保這兜，斯係大家打拚个結果；反轉來講，大家有打拚，臺灣人正有好沙鼻、正有好分人安腦該下。

編號 3 號

【貓鬧鐘】徐姿華原作

因爭驚會睡過邊，佢自細斯有設鬧鐘个習慣，讀書時節會用舊式鬧鐘，這下會用手機鬧鐘。愛睡進前先定好時間，時間一到，鬧鐘个音樂斯會響，摻當好睡个佢對甜甜个夢肚喊醒、對燒暖个被竇肚拉出來。分鬧鐘吵醒雖然當毋甘願，毋過總比赴毋著上課、上班，分先生、頭家刻臭頭較贏。

這恁久，佢過多一隻鬧鐘。這鬧鐘當心色，有幾下種方式喊人跣起，分這鬧鐘喊醒，心肝肚毋單淨毋會鬱卒，顛倒會目笑鼻翹，歡喜甘願跳下眠床，還會有歸日个好心情呢！係麼个樣个鬧鐘恁好用？哪位有好買啊？這鬧鐘孤門獨市、無哪好買，單淨為佢服務定定，這斯係佢个貓仔鬧鐘——咪咪。

普通時，手機个鬧鐘響，佢若還繼續勒床<sup>1</sup>，佢斯會喵喵滾緊喊，抑係用佢該粗鱗鱗个舌嫵舐佢个手，提醒佢好跣起咧；佢也會摻佢細細个頭那鑽到佢个手巴掌町，使妮討愛掌頭。恁樣得人惜个動作，哪儕還睡得落覺？黏時斯跋起來，認真摻佢掌頭、掌臉身，掌到時間及及咧正停手。

有一日晨早，時間到咧，佢个手機嘎無響，佢還睡到屎朥孔孔。背尾，迷迷糊糊試著有麼个在該揪佢个褲，佢目睡摸些脛著咪咪用牙齒輕輕嚙等佢个褲，揪一下、揪一下，放冗一下，又過來嚙。佢當細義無嚙著佢个腳髒，毋過，也摻佢喊醒咧。好得佢，該日上班正無慢到。

還有一擺，禮拜六毋使上班，佢挑挑無設鬧鐘，當在該發夢食大餐，結果，肚屎、胸脯嘎分人抑等，感覺重重、疾疾，目珠一擘啊開，摻咪咪四目相對，五公斤个佢，企在佢个肚屎面，犁下頭脛等佢，當像在該問講：「人，你毋使上班喲？還毋遽遽跣起？」唉載～這貓鬧鐘實在還心色哪！等佢跣起了，佢斯坐等脛佢出出入入、無閒準備上班。等佢愛出門咧，佢正尾翹高高行過來，在佢个腳脢徑兩下、喵兩聲，親像係摻佢講再會。

這咪咪，本旦瘦夾夾在公園流浪，來佢屋下三年，佢對會驚人到摻人親，到這下黏人又錫人，佢乖又即靈，實在分人惜入心。若係你也有一條恁得人惜个貓仔，日日做你个鬧鐘，有幾幸福你斯知哪！

<sup>1</sup> 勒床：音 ngiun' cong；賴床。

編號 4 號

【好得，雨落過咧】彭瑞珠原作

月光，在高高个天頂，分薄薄仔、火灰柑色个雲遮等；圍在雲背个月華，懶懶、毋想停動。闊闊、無麼个風浪个海面，一片恬靜，就單淨，遠遠、天邊該，兩三點漁船个電火，跔等無麼个想徒步个時間瞞啊瞞仔。

海面右側角个烏暗肚，一痕山蟻公恁大仔个鑽石碎，對海天之間順順仔遊等來。「係麼个船仔呢？佢个電火，仰恁幼？」「哪係幼，係幾下排電火層等，有錢人个船仔唷！」「毋係漁船，係大船仔呢！」該係貨輪，還係風力發電个工程船呢？都毋像。佢用兩十節<sup>1</sup>个速度，遊啊遊仔，遊到遠遠个頭前中央，分佢兜睜真。

「一、二、三、四……」<sup>2</sup>「船面，最少有五排電火……，啊，係載人去寮个郵輪啦！」<sup>3</sup>「佢愛下南？還係上北？駛去哪隻國家呢？」煞煞，撈出手機仔，毋使過揣咧！

根據阿古哥<sup>2</sup>个地圖，臺灣最北个燈塔——富貴角，在左手片

較過去一息仔；正頭前析，該係……，啊，愛去日本啦！船仔，就照等阿古哥講个「北方」，直直駛、駛到毋見忒，留分佢兜去「回想」。回想，千過儕共船遶寮个快樂，上擺，佢兜也識定過該船頂最高棧个房間，照這下个時間來睜，係食宵夜……。

玄玄風，一隻烏影對左手片掬啊過<sup>3</sup>，實在還急性！順等佢掬出來个方向，路燈照等个壁籬角，一隻五彩个螞蟻絲圓網，佢个邊脣，分該隻蝶仔撞爛一大空。一對晟光、晟光个螞蟻子哀仔，慢板慢板、恬恬在網脣睜，顛倒係佢兜代佢道嘆。

唉，睜咧一暗晡灰暗个海面，好駛車仔轉去睡咧！行到車脣正發現，青青个草坪軟松軟松<sup>4</sup>，草坪面滿哪仔都係靚嫩个細黃花。係啊，雨落過咧，薄雲開始散，滿天……都係幼幼个星光；韶早，會係好天時啊！

好得，雨落過咧，螞蟻阿母毋使過涿雨整網，還有柔柔个月光、靚靚个花坪摺佢做伴；佢兜也吹著五月涼風、睜著海景，供飽不少蚊仔咧。

<sup>1</sup> 節：音 zied`；此指速率單位，定義為每小時海里數。

<sup>2</sup> 阿古哥：音 a` gu` go；阿古哥，此指 Google。

<sup>3</sup> 掬啊過：音 sio` a` go`；以極快的速度經過。

<sup>4</sup> 軟松軟松：音 ngien` sim` ngien` sim`；柔軟彈動的樣子。

【老樟樹个春天】曾俊鑾原作

老樟樹企在路脣毋知幾多年哩，佢个樹身愛三個大人正做得圍起來，歲月在佢个臉身留下永久个影跡。就像舊年熱天做風搓，盡多樹極分風打斷截；底下个地泥也分水打走，跣跣糾糾<sup>1</sup>个樹根分人睭現現。該量時，佢分狂風吹到拗腰，強強會橫下去。前一站仔，又堵著最寒个寒天，三日風、三日霜，在本成結癩該搭仔必出還較深个傷口。

等最尾一擺寒流過詐，火蛇<sup>2</sup>緊曠，沉雷<sup>3</sup>響，老樟樹微微感受著對遠方傳過來沉沉个鼓聲，該係春天在地泥下睡醒个信號。佢先擘嘴擘鼻，續等伸一下腰骨，跔等風个節奏發出「喀喀」个聲音。空氣裡背開始鼻著一種特殊个芬芳，該係南方吹來溫暖个水氣，合等新生命黏時會必芽个味緒。

起先係該兜毋打眼个鵝鴿酸<sup>4</sup>摻臭頭香<sup>5</sup>，佢兜有一滴仔畏羞，對老樟樹腳下个地泥肚摻頭那探出來，嫩習習个葉仔懸等金皙皙

个露水。老樟樹摻這兜小生命低言細語，歡喜佢兜來共下迎接久違个春光。

初春个暗晡總係有一息仔清冷，北風合等雨微仔毋多知就到來哩，雨點輕輕仔打等老樟樹个葉仔，演奏一首和諧个夜曲。這兩水滋養燥卿卿个樹根，乜洗淨一身个塵灰。過無幾久，北風停，南風起，老樟樹睭著燕仔隨風來到，老朋友轉來哩。佢兜在街路个屋簷下無閒泊杈，對溪壩脣銜泥整舊年个老竇，流掠个身胚在藍藍个天頂劃出優美个弧線。佢兜係春天个使者，帶來對生命个祝福。

老樟樹下肯定定仔鬧熱起來。堵到燒暖个日仔，莊肚个老人家會在樹下行棋、打嘴鼓，耕種人會憑等樹身歇暈，放學个細孺仔會在佢个四圍爽份家啦摻園人尋。老樟樹企到澄澄精神百貫<sup>6</sup>，就像肚屎凸凸<sup>7</sup>高長大漢个老者，佢用闊闊个樹蔭為佢兜抵日頭，用輕輕个故氣為佢兜送涼風。

對眼前个情景，老樟樹當感動，滿心歡喜。佢睭往遠，高山崑頂<sup>8</sup>、平洋坑壠，都既經換忒灰色个舊衫，濛濛个濛沙煙下背係新色个大地。一陣風吹啊過來，老樟樹个極柁跔等風搖啊搖，佢毋堵好嘎啄目睡，一轉首，幼嫩个新葉就在手指尖頂綻筍。

<sup>1</sup> 跣跣糾糾：音 gioˇ gioˇ giu` giu`；彎彎曲曲。

<sup>2</sup> 火蛇：音 fo` sha；閃電。

<sup>3</sup> 沉雷：音 chim lui；悶雷。

<sup>4</sup> 鵝鴿酸：音 pug guˇ sonˇ；酢漿草。

<sup>5</sup> 臭頭香：音 chiu` teu hiongˇ；香附子。

<sup>6</sup> 精神百貫：音 zinˇ shin bag` guan`；精神勃勃。

<sup>7</sup> 肚屎凸凸：音 du` shi` tied tied；鼓起肚子。

<sup>8</sup> 高山崑頂：音 goˇ sanˇ gien` den`；高山山脊。

115 年全國語文競賽臺灣客語朗讀文章高中學生組（饒平腔）

編號 6 號

【拈著一隻青丟仔】范振新原作

舊年 6 月有一日下晝，一陣風時雨過後，佢去雜貨店个路上，遠遠睇著一隻毋知係麼个東西，在淺淺个水窟裡肚蠕蠕動，佢煞煞行前去睇真兜，原來係青丟仔个鳥子。

佢心肝肚胚想，敢係頭先分大雨打下來个？跔等斯聽著佢「啾～啾～啾～」个喙聲，佢臥頭緊尋，睇有厥爺哀無，噯無尋著，又睇該樹仔恁高，想愛摻佢放轉去也無法度。睇佢寒到激激顫，驚怕會消忒，高不將帶轉屋下去照顧。

該暗晡，佢無睡好，因為差毋多隔兩三點鐘就愛跔起來飼鳥子食水。逐擺飼佢食水个時節，就用手指滴一滴水在佢个嘴脣，佢个舌嫵就會凸出來，摻水喙落嘴肚。該量時，佢還毋會食飼料，佢愁會畜毋生，好得到第二日，佢就會討食咧。

見擺肚屎枵个時節，佢个頸根會擱著長長，嘴擘大大，還會盡命拈「啾啾啾啾啾！」搶等愛食。佢煞煞將飼料摻兜水，用細湯匙灌落去，一口、兩口、三口。鳥子逐擺都食毋多，毋過盡遽斯枵，所以愛輒輒飼，還又食啊飽就睡，正經係食飽睡、睡飽食。

拈轉來畜無一隻月，斯會飛咧。青丟仔學飛个時節，會撞來撞去，一下撞著壁，一下撞著玻璃，斯像嬰兒學行路共樣，下把仔會跌倒。有一擺佢又撞著咧，就嘴擘擘像失魂樣，恬恬企在鳥籠頂無停動，分佢盡愁慮，檢查過後，好得無仰般。就恁樣跌斷腳骨顛倒勇，緊撞緊飛，緊飛緊撞，慢慢仔，佢就越來越會飛咧，速度還當遽，成時會在桌下穿啊過，一瞞目就無睇著咧。該載，佢聽得識自家个名仔，喊一聲就會飛轉佢个手町。飛恁咧就會在巴掌嫵歇睏，摻頭那囡在翼胛下睡。

青丟仔係城市還盡輒睇得著个鳥仔，毋過頭擺毋識去注意。係背尾畜這鳥仔以後正發覺，在佢戴个屋脣，斷真有盡多。這下係聽著有青丟仔个喙聲，佢黏皮就知附近有青丟仔。佢兜个喙聲盡有變化，逐種喙聲都有佢个意義摻目的，佢聽佢个喙聲大體就揣得出佢想愛做麼个，比論講在該尋伴、分大鳥仔嚇著、撩佢發闊个喙聲，抑係當自然、當舒適時節个喙聲，全聽得出。

在屋下，鳥籠門佢毋識關，隨在佢飛。這下逐日都會聽著佢當輕鬆个喙聲，斯像精靈在該唱歌樣，「啾～」毋會停。

115 年全國語文競賽臺灣客語朗讀文章高中學生組（饒平腔）

編號 7 號

### 【梨情二三事】郭亭好原作

阿公種有一大片个梨仔，春天个時節，蓬白个梨花開到鬧摠摠，等到熱天橫山梨斯打到墜極墜袴。頭擺有梨「高接」个技術，梨農做下係種橫山梨。橫山梨大嫻粒，皮又粗，想愛價數賣來好，包裝進前定著愛先洗過，所以在寮涼該下，長下會睭著農家人一屋大細戴等棉紗手袋仔、圍等一隻用水筴透水个大腳盆在該洗大梨。

緊工時節，佢幾個細孺仔會分阿公懸轉去搵手。有一擺，表阿哥無認真洗梨斯顧爽水，結果一粒像嬰兒頭那恁大粒个梨仔，斯「啱」聲輪到地泥下，阿公睭著斯咄：「這南蛇、這南蛇！正經係生雞卵無、屙雞屎有。認真兜莫過爽咧，連靚靚个梨也摻佢輪到地泥下，實在還刷頭哪！」分人刻臭頭个表阿哥，嘴嘟鼻翹毋敢過爽咧。

阿嬤睭著毋盼得斯講：「好咧、好咧！大家較認真兜，下晝渡你兜共下去果菜市场賣梨！」哇！聽著做得跔去賣梨，大家个精神斯來咧。尤其係表阿哥黏時斯企跔起來，當遽手个摻米籬肚个大梨一粒、一粒緊拈落腳盆肚，包裝个時節也特別認真。睭佢

兜略略較慢板兜，佢斯會像班長个樣緊追佢兜。因爭佢知有好食个大麵摻仙草冰在果菜市场等等佢兜。

下晝時頭个果菜市场鬧熱煎煎，買果子个販仔像鷓婆樣，目珠利利在市场肚滿哪巡來巡去，睭哪儕个梨清甜好食；若係分佢睭中意个，斯用佢該利犴个背，煞猛摻你啄價數，剝到這兜農民血流血濯。毋過阿嬤對自家種个梨仔品質當有把扼，若係販仔來開个價數爭差忒多，佢定著毋肯放，有睭過中意个販仔斯來來去去走幾下輪、膏忒歸點鐘，毋過阿嬤共樣恁堅持，最尾該販仔無奈何，斯照阿嬤開个價數來買貨。

佢兜這幾個細孺仔睭著梨仔賣忒咧，歡喜到緊跳，緊追阿公、阿嬤：「遽遽啦、遽遽啦！佢兜个肚屎枵到憑背囊咧啦！」大麵一捧啊來，大家斯像枵鬼个樣，毋驚燒、頭搖搖大口大口煞猛啖。睭佢兜食到汗流脈落，惜佢兜个阿嬤，總會過喊幾碗透心涼个仙草冰分佢兜食。

該量時，傍等阿公、阿嬤个笑容，摻叔伯兄弟共下搶筴个好味緒，永園腦膈肚。這下，該搭仔个知名大麵攤、仙草攤，也尋毋轉咧！

編號 8 號

【掌鹽个西瓜】黃美貞原作

佢一直記得細人仔時个熱天，係對一粒西瓜開始个。

該年佢小學三年生，阿姆在菜園箍一細埕地，講愛自家來種幾頭西瓜食，做得省一息買果子个錢，又做得少食兜仔零塔。第一擺睭該叢細細仔个西瓜秧，葉仔皮毛鬢鬢仔，生當慢，逐日放學第一件事情就係跔在佢脣頭，睭佢有變較大一息仔無。該年熱天特別熱，日頭炙到地泥會難人。佢攞等細錫桶去浴水，還用舊遮仔摺佢抵日頭，細心細意來照顧。

叔婆睭著佢日日無閒泊杈，笑等講：「你種西瓜比佢還較認真哦！」對種瓜來講，叔婆係老師傅了，逐年熱天，佢總會擇兜仔自家種个西瓜來賣。佢用擔竿揸等菜籃，一片放一粒西瓜，伙房人食飽晝在竹頭下坐寮个時節，佢就切到一賺賺仔分大家試食睭啊。該沙沙又甜甜个味緒，大家相賽注文，兩下半就應淨淨了。

佢種个西瓜總算在避暑該下開花，結果，該日，氣象報導風搓愛來了，阿爸細心細義去田肚摘轉來，先放在屋簷下，佢拗等大西瓜毋肯放，緊講毋盼得破來食。食飽夜，一屋下人坐在禾埕

打嘴鼓，阿姆提出一支利利个長刀仔，輕輕仔破一下，佢就一路必開來。歸析紅濟濟个西瓜，還有烏金烏金个瓜仁排到齊齊，小可紅个西瓜水，像口涎啣啣仔緊流。

佢等毋掣阿姆切，遽遽挖一兜塞到嘴空。甜係甜，毋過比起叔婆賣个，又試著還差一息仔。阿姆笑等搖頭，對灶下提出一細碟鹽，「來，掌一息鹽試睭哪。」雖然試著疑狐還係照等做。無想著，咬一口，西瓜正經變甜了。該年過後，屋下會種幾頭仔西瓜。雖然毋係粒粒靚，成時生來還孬孬、成時又分蟲仔蜒過，掌兜鹽落去，該西瓜就係童年記憶裡肚最清甜个味道。

這下个西瓜大體對外地運來，外皮亮線、口感共樣，還有摺等合格个紅印仔，毋過佢總係試著少了麼个東西，少忒該種自家種瓜時節个望想、日頭下汗流脈落个辛苦。因為正經个甘甜，係園在平凡裡肚，愛一息仔鹽，正食得出來。

編號 9 號

【比手機仔較智慧】李淑娟原作

手機手機，人手一機！現代个學生仔大體都做得講係低頭族，火車頭、捷運站、公車肚，無論坐等、抑企等，耳機一塞、手機一畫，網路世界花喇必駁，像毒品樣恁錫人，頭沉沉仔沒到裡背毋想出來。

國中畢業該年，考試个成績還罔罔仔，阿爸送佢一支智慧型手機，交代講，愛利用佢來好好學習。睺等該時行个色目，還有後背該粒缺角个蘋果、專業个三隻鏡頭，佢連等幾日暢到毋使食飯，淨笑都會飽。

高中生活強調自主學習，無人掌等讀書交作業，想讀幾多內容、愛加強哪隻科目都愛靠自家規劃，又合先生無恁嚴條，分線上遊戲錫著个佢一下失算忒，嘎尋毋著學習个動力、讀書个目標，作業層三砵四無寫、無做、無交。講乜奇怪，該新个流行歌曲聽咧幾遍仔佢就會唱，再難个遊戲爽有兩擺就試著熟絡，毋過，聽先生講話就像鴨仔聽雷共樣，上課啄目睡、坐等緊打米<sup>1</sup>。

<sup>1</sup> 緊打米：音 gin` da` mi` / gin` da` mi`；形容人打瞌睡一直點頭的樣子像前人打米的動作。

睺佢逐日掌手機，一離開手機就懊懊躁躁緊發闕，輒常半夜轉點咧還毋睡，偷偷摺摺搯等被骨爽到臨天光，阿姆心焦馬亂唸講：「再爽下去，目珠會青暝忒哦！」毋知分醒个佢總係左片耳空入，右片耳空出，還想著奸計——詐屙屎固落便所爽，確確係老古人講个：「懶人無屙無好奈！」一暗晡愛屙兩三到，一到愛屙完點鐘，無屙到阿姆來碰<sup>2</sup>門絕對毋出來。

一直愛到考試个前一禮拜正會開始愁慮，坐在書桌前掀開新衝衝个課本，嘎毋知愛對哪位開始讀，牙研目皺提等原子筆，頭那疾到硬硬會噉忒。過無兩日个好光景，想拚个決心像風恁輕，讀書个計畫比紙較薄，數學哪有遊戲恁心色，英文廣播哪有音樂恁好聽，懊躁个佢又開始畫手機尋快樂咧。用腳膝頭想乜知，學期結束个時節，幾下科目無及格，化學連補考个機會都無，唉！實在見笑。

阿嬤講過：「橫一擺，總毋好再過橫第二擺。」這下佢正知，人愛比手機較有智慧，摻佢睺做學習个輔助工具，毋係魂佢魂到變縲死時間个主人。愛好好管理時間、規劃學習个節奏、尋出自家个方向、認真讀書，恁樣，人生正毋會輸忒。

<sup>2</sup> 碰：音 pong`；捶擊。

115 年全國語文競賽臺灣客語朗讀文章高中學生組（饒平腔）

編號 10 號

【行出去，正有風景】范振新原作

在臺灣，有人講，人生在世有三件事情定著愛做：蹶玉山、泳渡日月潭、還過騎自行車環島。雖然講，這兜全無恁該，愛堅耐、還愛有體力正奈得何。也有人講，該恁慄个頭路，何麼个死苦，食飽袒閒係無？毋過，還係有緊來緊多个人相賽去自我挑戰。阿宏乜共樣，將這三件事情，準做佢人生个目標。

從細，阿宏厥爸總係講：「做人做事愛有膽，毋識做過个就愛去試，無試仰會知！」厥爸會恁樣講，斯係希望阿宏愛培養勇敢面對艱難个自信，斯像人講：「敢去就一擔樵，毋敢去就屋下愁。」所以，厥爸當鼓勵佢趕後生，身體還較砸个時節，去挑戰人生。受著厥爸个影響，阿宏 18 歲生日該日，就騎等自行車，單人獨馬走去環島。

出發該日一色青天，阿宏打早就一身運動个衫褲，騎等屋下該臺，既經捩過臺灣兩圈个腳踏車準備出發。無毋著，這臺自行車雖然毋係當高級，毋過已耐戰，佢兩個阿哥都係騎這臺鐵馬去環島，恁多年來毋識壞忒。出發前，斯單淨加安隻車架放包袱，再過摺輪仔嘮風就出門。無特別安排个路線，乜無按算一日愛騎

幾遠，斯跔等自家个心情來行。

這擺環島無先抽牽規劃，正經係「時到時擔當，無米正來煮番薯湯」。有幾日斷烏咧，還言決定愛在哪位歇，臨時臨及正上網尋。壞蹄咧！該日騎到臺東，的對堵著奈日，又無先定，問幾下間旅社嘎全無間房，高不將走去海脣个沙灘睡。雖然沙灘無眠床恁好勢，毋過，脣頭無別儕，恬靜恬靜，斯聽著海湧个聲一陣一陣，四圍暗摸叮咚，天頂个星仔一瞞一瞞，這夜，阿宏就在滿天星光之下睡忒咧。

第二日天矇光，阿宏坐在沙灘，遠遠睺著該火紅色个大卵黃，對海竇肚鑽啊出來，緊來緊大、緊來緊光。睺著這天闊地闊个光景，阿宏在心肝肚想：有兜路，無行過，你毋知風景在哪町；有兜事情，無親身去做，你永久毋知自家做得行幾遠。